



JAKUB SKALNÍK, AMBASADOR ČESKE REPUBLIKE
U BOSNI I HERCEGOVINI

*BiH posjetiocima nudi
kombinaciju Švicarske
i američkog Kolorada*

JAKUB SKALNÍK, AMBASSADOR OF THE CZECH REPUBLIC
TO BOSNIA AND HERZEGOVINA

*B&H offers visitors a
combination of Switzerland
and American Colorado*

VISIT B&H

www.visitbih.ba

*Intervju i fotografije su preuzeti iz magazina VISIT BiH
(februar, 2018. – verzija na bosanskom jeziku).*

Tekst prilagodila: Gordana Frimel

Jakub Skalník već tri je godine ambasador Češke Republike u Bosni i Hercegovini. U intervjuu za magazin VISIT BiH kaže da je Bosna i Hercegovina lijepa zemlja, u kojoj žive dragi ljudi, te da je prepuna prirodnih ljepota.

Ambasador ste Češke Republike u BiH već tri godine. Možete li nam reći Vaše impresije o Bosni i Hercegovini?

- Moja iskustva do sada su u potpunosti pozitivna. Ljudi su vrlo prijateljski i srdačni, naša zemlja ovdje ima jako dobru reputaciju, što olakšava moj posao ovdje. Za vas neće biti novost kada spomenem da je otežavajući faktor, na putu da zemlja bude uspješnija, između ostalog, veoma komplikovana politička i administrativna struktura njene podjele.

Koliko ste putovali po Bosni i Hercegovini? Šta Vas je najviše dojmilo i šta je to od prirodnih ljepota u BiH što Vam je ostalo u najljepšem sjećanju?

- Po Bosni i Hercegovini putujem jako puno, kako u okviru svojih radnih obaveza, tako i

privatno. To je, prije svega, zemlja puna prirodnih ljepota – planine, kanjoni, divlje rijeke i dosta drugih prirodnih dragulja. Uz malo pretjerivanja govorim da, što se tiče prirodnog bogatstva, Bosna i Hercegovina svojim posjetiocima nudi kombinaciju Švicarske i američkog Kolorada.

Kako Vam se sviđa bosanskohercegovačka hrana?

- Hrana mi u BiH jako prija, i samim tim predstavlja stvarnu "prijetnju" mojoj liniji i održavanju zdravog nivoa holesterola u krvi. Naravno, legendarni su lokalni ćevapi u svim njegovim regionalnim oblicima, ali također jako uživam i u ribljim specijalitetima.

Šta mislite o turističkim potencijalima BiH i kakva je, prema Vašem mišljenju, šansa za razvoj turizma u BiH?

- BiH ima veliki turistički potencijal i mogla bi postati ciljem, prije svega, turista iz inostranstva, koji rado aktivno provode svoj godišnji odmor. Problem je nedovoljno razvijena turistička infrastruktura, prije svega smještajni kapaciteti i pripadajuće dodatne ponude (kulturni programi, wellness, aktivnosti za djecu). BiH je također teže dostupna što se tiče transporta – ovdje nije razvijena mreža autoputeva, te iz velikog broja zemalja uključujući i Češku Republiku ne postoji direktna aviolinija. Ukoliko vaša zemlja želi da privuče više turista, neophodno je prije svega da se usmjeri na izgradnju transportne infrastrukture, na prvom mjestu Koridora Vc.



Koliko je prisustvo čeških kompanija u BiH?

- Kada govorimo o broju čeških kompanija u BiH, onda nažalost govorimo o broju od nekoliko kompanija, ne o desecima ili stotinama prisutnih. Plaši ih slaba politička stabilnost i nedostatak transparentnosti poslovnog okruženja.

Da li postoji interes čeških investitora za ulaganje u BiH?

- Među češkim investitorima postoji relativno veliki interes za investiranje u zemljama bivše Jugoslavije. Privlači ih kvalifikovana radna snaga i jezička i kulturna srodnost. Kao što sam već spomenuo, kada je u pitanju BiH, postoji veliki oprez zbog političke situacije koja se smatra kao nestabilna, i također zbog slabe transparentnosti ekonomskog okruženja i nedovoljne provedbe zakona. Zbog toga se trenutno prednost daje Hrvatskoj i Srbiji.

Koje su privredne grane najzanimljivije češkim biznismenima?

- Naše poduzetnike najviše interesuje oblast energetike, i to prije svega proizvodnja električne energije i iskoristivost obnovljenih izvora energije, uključujući geotermalnu energiju i biomasu. Također je zanimljivo područje izgradnje infrastrukture za prečišćavanje otpadnih voda, uključujući kanalizacionu mrežu. Posljednje, ali ne manje važno je rudarska industrija i obrada drveta.

Postoji li neki plan aktivnosti koji će približiti BiH biznismenima iz Češke Republike i obratno?

- Naša ambasada učestvuje u programima češke vlade na podršci ekonomske saradnje s inostranstvom u okviru programa podrške ekonomske diplomatije. Godišnje ovdje realizujemo nekoliko projekata, u okviru kojih pomažemo u povezivanju poduzetnika s firmama iz naših zemalja. Posljednji takav projekat je realizovan u oktobru prošle godine, kada su u posjeti Češkoj Republici bili poduzetnici iz Bosne i Hercegovine koji se bave poslovima u oblasti obrade drveta.